

摛藻堂四庫全書薈要

集部

欽定四庫全書薈要卷一萬九千六百十八集部

漢魏六朝百三家集卷二十九

明 張溥 輯

王粲集

賦

遊海賦

乘菌桂之芳舟浮大江而遙逝翼驚風而長驅集會稽  
而一睨登陰隅以東望覽滄海之體勢吐星出日天與

水際其深不測其廣無泉尋之冥地不見涯洩章亥所  
不極盧敖所不届懷珍藏寶神隱恠匿或無氣而能行  
或含血而不食或有葉而無根或能飛而無翼鳥則爰  
居孔鵠翡翠鸕鷀繽紛往來沈浮翶翔魚則橫尾曲頭  
方目偃頷大者若山陵小者重釣石乃有賁蛟大貝明  
月夜光蠟璧璗瑁金質黑章若夫長洲別島基布星峙  
高或萬尋近或千里桂林藂乎其上珊瑚周乎其趾羣  
犀代角巨象解齒黃金碧玉名不可紀洪洋洋誠不

可度也處嶼夷之正位兮同色號於穹蒼包納污之弘  
量正宗廟之紀綱總衆流而臣下為百谷之君王

登樓賦

登茲樓以四望兮聊暇日以銷憂覺斯宇之所處兮實  
顯敞而寥仇挾清漳之通浦兮倚曲沮之長洲背墳衍  
之廣陸兮臨皋隰之沃流北彌陶牧西接昭丘華實蔽  
野黍稷盈疇雖信美而非吾土兮曾何足以少留遭紛  
濁而遷逝兮漫踰紀以迄今情眷眷而懷歸兮孰憂思

之可任憑軒檻以遙望兮向北風而開襟平原遠而極  
目兮蔽荆山之高岑路逶迤而修迥兮川既漾而濟深  
悲舊鄉之壅隔兮涕橫墜而弗禁昔尼父之在陳兮有  
歸歎之歎音鍾儀幽而楚奏兮莊鳥顯而越吟人情同  
於懷土兮豈窮達而異心惟日月之逾邁兮俟河清其  
未極冀王道之一平兮假高衢而騁力懼匏瓜之徒懸  
兮畏井渫之莫食步棲遲以徙倚兮白日忽其將匿風  
蕭瑟而並興兮天慘慘而無色獸狂顧以求羣兮鳥相

鳴而舉翼原野間其無人兮征夫行而未息心悽慘以  
感發兮意忉怛而憐惻循階除而下降兮氣交憤於胸  
臆夜參半而不寐兮悵盤桓以反側

浮淮賦

從王師以南征兮浮淮水而遐逝背渴浦之曲流兮望  
馬丘之高澨泛洪檣于中潮兮飛輕舟乎濱濟建衆檣  
以成林兮譬無山之樹藝於是迅流興潭浪濤波動長  
瀨鉦鼓若雷旌麾翳日飛雲天迴蒼鷹飄逸滂沛洶溶

遞相競軼飛驚波以高騖馳駭浪而赴質加舟徒之巧  
極美榜人之閑疾白日未移前驅已屆羣帥按部左右  
就隊舳艤千里名卒億計運茲威以赫怒清海隅之帶  
芥濟元勲於大舉垂休績乎遠裔

初征賦

違世難以迴折兮超遙集于蠻楚逢屯否而底滯兮忽  
長幼以羈旅賴皇華之茂功清四海之疆宇超南荆之  
北境踐周豫之末畿野蕭條而騁望路周達而平夷春

風穆其和暢兮庶卉煥以敷蕤行中國之舊壤實吾願  
之所依當短景之炎陽犯隆暑之赫曦薰風溫溫以增  
熟體熑熑其若焚

羽獵賦

濟漳浦而橫陣倚紫陌而並征樹重置於西址列駿騎  
乎北坰遵古道以游豫兮昭勸助乎農圃因時隙之餘  
日兮陳苗狩而講旅相公乃乘輕軒駕四駱拊流星屬  
繁弱選徒命士威興竭作旌旗雲擾鋒刃林錯揚輝吐

火曜野蔽澤山川於是乎搖蕩草木為之摧落禽獸振  
駭魂亡氣奪舉首觸絲搖尾遇撻陷心裂胃潰頸破頰  
鷹犬競逐奕奕霏霏下韁窮縲搏肉噬肌墜者若雨僵  
者若坻清野滌原莫不殲夷

思友賦

登城隅之高觀忽臨下以翶翔行遊目於林中覩舊人  
之故場身既沒而不見餘迹存而未喪滄浪浩兮迴流  
波水石激兮揚素精夏木兮結莖春鳥兮愁鳴平原兮

決滌綠草兮羅生超長路兮逶迤實舊人兮所經身既逝兮幽翳魂眇眇兮藏形

傷天賦

惟皇天之賦命實浩蕩而不均或老終以長世或昏天而夙泯物雖存而人亡心惆悵而長慕哀皇天之不惠抱此哀而何憇求魂神之形影羌幽冥而弗迄淹徘徊以想像心彌結而紝縈晝忽忽其若昏夜炯炯而至明

出婦賦

既僥倖兮非望逢君子兮弘仁當隆暑兮翕赫猶蒙眷  
兮見親更盛衰兮成敗思情固兮日新竦余身兮敬事  
理中饋兮恪勤君不篤兮終始樂枯荑兮一時心搖蕩  
兮變易忘舊姻兮棄之馬已駕兮在門身當去兮不疑  
攬衣帶兮出戶顧堂室兮長辭

寡婦賦

闔門兮却掃幽處兮高堂提孤孩兮出戶與之步兮東  
廂顧左右兮相憐意悽愴兮摧傷觀草木兮敷榮感傾

葉兮落時人皆懷兮歡豫我獨感兮不怡日掩曖兮不  
昏明月皎兮揚暉坐幽室兮無為登空牀兮下幃涕流  
連兮交頸心憐結兮增悲

神女賦

惟天地之普化何產氣之淑真陶陰陽之休液育天麗  
之神人稟自然以絕俗超希世而無羣體纖約而方足  
膚柔曼以豐盈髮似玄鑒鬢類刻成質素純皓粉黛不  
加朱顏熙曜暭若春日譬含丹目若瀾波美姿巧笑靨

輔奇牙戴金羽之首飾珥照夜之珠璫襲羅綺之黼衣  
曳縟繡之華裳錯纘紛以襍桂佩熠爚而焜煌退變容  
而改服冀致態以相移稅衣裳兮免簪笄施華的兮結  
羽儀揚娥微盼懸眇流離婉約綺媚舉動多宜稱詩表  
志安氣和聲探懷授心發露幽情彼佳人之難遇真一  
遇而長別顧大罰之淫愆亦終身而不滅心交戰而貞  
勝乃回意而自絕

閑邪賦

夫何英媛之麗女貌洵美而艷逸橫四海而無仇超遐  
世而秀出發棠棣之春華當盛年而處室恨年歲之方  
暮哀獨立而無依情紛拏以交橫意慘悽而增悲何性  
命之奇薄愛兩絕而俱違排空房而就衽將取夢以通  
靈目炯炯而不寐心忉怛而惕驚

大暑賦

惟林鍾之季月重陽積而上升喜潤土之溽暑扇溫風  
而至興或赫熾以瘴炎或鬱衍而燠蒸獸狼望以倚喘

鳥垂翼而弗翔根生苑而焦炙豈含血而能當遠昆吾  
之中景天地翕其同光征夫瘁於原野處者困於門堂  
患衽席之焚灼譬烘燎之在床起屏營而東西欲避之  
而無方仰庭槐而嘯風風既至而如湯氣呼吸以怯短  
汗雨下而霑裳就清泉以自沃猶沃忍而不涼體煩如  
以於悒心情悶而窘惶於是帝后順時幸九嵕之陰岡  
託甘泉之清野御華殿於林光潛廣室之邃宇激寒流  
於下堂重屋百層垂蔭千廡九闔洞開周帷高舉堅冰

常奠寒饌代叙

酒賦

帝女儀狄旨酒是獻苾芬享祀人神式宴辯其五齊節  
其三事醍沈盎泛清濁各異章文德於廟堂協武義于  
三軍致子弟之孝養糾骨肉之睦親成朋友之歡好贊  
交往之主賓既無禮而不入又何事而不因賊功業而  
敗事毀名行以取誣遺大恥於載籍滿簡帛而見書孰  
不飲而罹茲罔非酒而惟事昔在公旦極茲語言濡首

屢舞談易作難大禹所忌文王是艱

祭壇碁賦序附○夫注心銳志自求諸身投壇是也

祭彈碁賦序附○因行聘志通權達理六搏是也  
祭圍碁賦序附○清靈體道稽謨玄神圍碁是也

瑪瑙勒賦

遊大國以廣觀覽希世之偉寶總衆材而課美信莫臧  
於瑪瑙被文采之華飾雜朱綠與蒼阜於是乃命工人  
裁以飾勒因姿象形匪雕匪刻厥容應規厥性順德御  
世嗣之駿服表驥驥之儀則

車渠枕賦

侍君子之宴坐覽車渠之妙珍挺英才於山岳含陰陽  
之淑貞飛輕縹與浮白若驚風之飄雲光清朗以內曜  
澤溫潤而外津體貞剛而不撓理條達而有文雜玄黃  
以為質似乾坤之未分兼五德之上美超衆寶而絕倫

迷迭賦

惟遐方之珍草兮產崑崙之極幽受中和之正氣兮承  
陰陽之靈休揚豐馨於西裔兮布和種於中州去原野

之側陋兮植高宇之外庭布萋萋之茂葉兮挺苒苒之柔莖色光潤而采發兮似孔翠之揚精

柳賦

昔我君之定武致天屆而徂征元子從而撫軍植佳木于茲庭歷春秋以踰紀行復出於斯鄉覽茲樹之豐茂紛猗旎以修長枝扶疎而覃布莖森梢以奮揚人情感於舊物心惆悵以增慮行游目而廣望觀城壘之故處悟元正之語言信思難而存懼嘉甘棠之不伐畏取累

於此樹苟遠跡而退之豈駕馳而不屢

槐賦

惟中唐之奇樹稟天然之淑姿超疇畝而登殖作階庭  
之華暉形禕禕以暢條色采采而鮮明豐茂葉之幽藹  
履中夏而敷榮既立本於殿省植根柢其弘深鳥明栖  
而投翼人望庇而披襟

白鶴賦

白翎稟靈龜之修壽資儀鳳之純精接王喬於暘谷駕

赤松於扶桑食靈岳之瓊藥吸雲表之露漿

鶠賦

步籠阿以躡躅叩衆目之希稠登衡幹以上干歟哀鳴  
而舒憂聲嚶嚶以高厲又慘慘而不休聽喬木之悲風  
羨鳴友之相求日奄藹以西邁忽逍遙而既寘就隅角  
而斂翼倦獨宿而宛頸

鶠賦

惟茲鶠之為鳥信才勇而勁武服乾剛之正氣被淳馭

之質羽憩晨風以羣鳴震聲發乎外寓厲廉風與猛節  
超羣類而莫與惟膏薰之焚銷固自古之所咨逢虞人  
而見獲遂囚執乎縲累賴有司之圖功不開小而漏微  
令薄軀以免害從孔鶴於園湄

鶯賦

覽堂隅之籠鳥獨高懸而背時雖物微而命輕心悽愴  
而愍之日奄藹以西邁忽逍遙而既冥就隅角而斂翼  
眷獨宿而宛頸歷長夜以向晨聞倉庚之羣鳴春鳴翔

於南薨戴鴛集平東榮既同首而異憂實感類而傷情  
書

為劉荊州與袁譚書

天降災害禍難殷流初交殊族卒成同盟使王室震蕩  
彝倫攸斁是以智達之士莫不痛心入骨傷時人不能  
相忍也然孤與太公志同願等雖楚魏絕邈山河迥遠  
戮力乃心共獎王室使非族不干吾盟異類不絕吾好  
此孤與太公無貳之所致也功績未卒太公殂隕賢肩

承統以繼洪業宣奕世之德履不顯之祚摧嚴敵於鄴  
都揚休烈於朔土顧定疆宇虎視河外凡我同盟莫不  
景附何悟青蠅飛於竿旌無忌游於二壘使股肱分成  
二體胷膂絕為異身初聞此問尚謂不然定聞信來乃  
知閼伯實沈之忿已成棄親即讎之計已決旃旆交於  
中原暴尸累於城下聞之哽咽若存若亡昔三王五伯  
下及戰國君臣相弑父子相殺兄弟相殘親戚相滅蓋  
時有之然或欲以成王業或欲以定霸功皆所謂逆取

順守而徼富彊于一世也未有棄親即異兀其根本而能全於長世者也昔齊襄公報九世之讎士匄卒苟偃之事是故春秋美其義君子稱其信夫伯游之恨於齊未若太公之忿於曹也宣子之臣承業未若仁君之繼統也且君子違難不適讐國交絕不出惡聲況忘先人之讎棄親戚之好而為萬世之戒遺同盟之恥哉蠻夷戎狄將有誚讓之言況我族類而不痛心邪夫欲立竹帛於當時全宗祀於一世豈宜同生分謗爭校得失乎

若冀州有不弟之傲無慙順之節仁君當降志辱身以  
濟事為務事定之後使天下平其曲直不亦為高義邪  
今仁君見憎於夫人未若鄭莊之於姜氏兄弟之嫌未  
若重華之於象教然莊公卒崇大隧之樂象教終受有  
鼻之封願捐棄百疴追攝舊義復為母子兄弟如初今  
整勒士馬瞻望鵠立

為劉荊州與袁尚書

表頓首頓首將軍麾下勤整六師芟討暴虐戎馬廝養

罄無不宜甚善甚善河山阻限狼虎當路雖遣驛使或至或否使引領告而莫達初聞郭公則辛仲治通內外之言造交遘之隙使士民不協奸釁並作聞之譖然為增忿怒校尉劉堅皇河田買等前後到荆得二月六日所起書又得賢兄貴弟顯雍及審別駕書陳叙事變本末之理乃知變起辛郭禍結同生追闕伯實沈之蹤忘棠棣死喪之義親尋干戈僵屍流血聞之哽咽若存若亡乃追案書傳思與古比昔軒轅有涿鹿之戰周公有

商奄之軍皆所以剪除災害而定王業者也非強弱之  
爭喜怒之忿也是故滅親不為尤誅兄不傷義也今二  
君初承洪業纂繼前軌進有國家傾危之慮退有先公  
遺恨之責當惟曹氏是務不爭雄雌之勢惟國是康不  
計曲直之利雖蒙塵垢罪下為隸圉析入汙泥猶當降  
志辱身方以定事為計何者夫金木水火以剛柔相濟  
然後克得其和能為民用若使金與金相連火與火相  
爛則熑然摧折俱不得其所也今青州天性峭急迷於

目前曲直是非昭然可見仁君智數弘大綽有餘裕當以大包小以優容劣歸是於此乃道教之和義士之行也縱不能爾有難忍之忿且當先險曹操以卒先公之恨事定之後乃議兄弟之怨使記注之士定曲直之評不亦上策邪且初天下起兵以尊門為主是以衆寡噶喝莫不樂袁氏之大也今雖分裂有存有亡嚮然景附未有革心若仁君兄弟能悔前之謬克已復禮以從所驩則弱者自以為強危者自以為寧誠欲戮力長驅共

獎王室雖亡之日猶存之願則伊周不足參五伯不足  
六也若使迷而不返遂而不改則戎狄蠻夷將有誚讓  
之言況我同盟復能戮力為君之役哉則是太公墳壠  
將有汙池之禍夫人弱小將有滅族之變彼之與此豈  
可同日而論之哉且行違道以自存猶尚不可況失義  
以自亡而遺敵之禽哉此韓盧東郭自困於前而遺田  
父之獲也昔齊公孫竈卒晏子知子期之不免也故曰  
二惠競爽猶可又弱一箇姜氏危哉表與劉左將軍及

北海孫公佑共說此事未嘗不痛心入骨相為悲傷也  
令整勒士馬憤踊鶴立冀聞和同之聲約一舉之期故  
復遺信并與青州書若其泰也則袁族其與漢升降乎  
若其否也則同盟永無望矣臨書愴恨不知所言

檄

為荀彧與孫權檄

昨令將帥戰士就渤海七八百里演習舟楫四年之內  
無日休解今已擊擢若飛回柁若環

七

七釋

潛虛丈人違世遁俗恬淡清玄渾沌淳樸薄禮愚學無為無欲均同死生混齊榮辱於是大夫聞而歎曰蓋聞君子不以仕易道不以身後時進德修業與世同理今子深藏其身高棲其志外無所營內無所事邯鄲才女三齊巧士名唱秘舞承閑並理七盤陳於廣庭疇人儼其齊侯翩飄微霍亂精蕩神巴渝代起鞞鐸響振農功

既登玄陰戒寒乃致衆庶大獵中原植旌拊表班授行  
曲組綱連置彌山跨谷弦不虛控矢不徒往僵禽連積  
隕鳥若雨麗才美色希世特立豐膚曼肌弱骨纖形鬢  
髮玄鬢修項秀頸紅顏照曜瞳若苕榮戴明中之羽雀  
雜華錫之歲蕤珥照夜之雙璫煥熳爚以垂暉聖人在  
仕時邁其德先天弗違稽若古則叡哲文明允恭玄塞  
登俊乂於壠畝舉賢才於仄微置彼周行列於邦畿九  
德咸事百僚師師於是四海之內咸變時雍普天率土

比屋可封是以棲林隱谷之夫逸迹放言之士鑒平有  
道貧賤是恥

記

荊州文學記

有漢荊州牧劉君稽古若時將紹厥績乃曰先王之為  
世也則象天地軌儀憲極設教導化敘經志業用建雍  
泮焉立師保焉作為禮樂以作其性表陳載籍以持其  
德上知所以臨下下知所以事上官不失守民聽無悖

然後大階平焉夫文學也者人倫之守大教之本也乃命五業從事宋衷所作文學延明徒焉宣德音以贊之降嘉禮以勸之五載之間道化大行耆德故老慕母闔等負書荷器自遠而至者三百有餘人於是童幼猛進武人革面總角佩觿委介免胄比肩繼踵川逝泉湧亹亹如也兢兢如也遂訓六經講禮物諧八音協律呂修紀歷理刑法六路咸秩百氏備矣

天降純嘏有所底授臻於我君受命既茂南牧是建荆

衡作守時邁淳德宣其不繇厥繇伊何四國交阻乃赫  
斯威爰整其旅虔夷不若屢戡寇侮誕啟洪軌敦崇聖  
緒典墳既章禮樂咸舉濟濟縉紳盛茲階宇祁祁髦俊  
亦集爰處和化普暢休徵時叙品物宣育百穀繁蕪勲  
格皇穹聲被四宇

論

務本論

古者之理國也以本為務八政之於民也以食為首是

以黎民時雍降福孔嘉也故仰伺星辰以審其時俯耕  
藉田以率其力封祀農稷以神其事祈穀報年以寵其  
功設農師以監之置田畯以董之黍稷茂則喜而受賞  
田不墾則怒而加罰都不得有游民室不得有懸耜野  
積踰冬奪者無罪場功過限竊者不刑所以競之於閑  
藏也先王藉田以力任力以夫議其老幼度其遠近種  
有常時耘有常節收有常期此賞罰之本種不當時耘  
不及節收不應期者必加其罰苗實踰等必加其賞也

農益地辟則吏受大賞也農損地狹則吏受重罰也夫  
火之焚人也甚於急農慎火之力也輕於耘秬通邑大  
都有嚴令則火稀無嚴令則燒者數非賞罰不能濟也

### 三輔論

湘潛先生江濱逸老將集論雲夢玄公豫焉先生稱曰  
蓋聞戎不可動兵不可揚今劉牧建德垂芳名烈既彰  
矣曷乃稱兵舉衆殘我波靈逸老曰是何言與天生五  
材金作明威長沙不軌敢作亂違我牧覩其然乃赫爾

發憤且上征下戰去暴舉順州牧之兵建拂天之旌鳴  
振地之鼓玄胄曜日犀甲如堵以此衆戰孰能嬰御劉  
牧之懿子又未聞乎履道懷智休迹顯光洒掃羣虜艾  
撥穢荒走袁術於西境馘射貫乎武當遏孫堅於漢南  
追揚定於折商

難鍾荀太平論

聖莫盛於堯而洪水方割丹朱淫虐四族凶佞矣帝舜  
因之而三苗畔矣禹因而防風為戮矣此三聖古之

所大稱也繼踵相承且二百年而刑罰未嘗一世而乏  
也然則此三聖能平三聖能平則何世能致之乎孔子  
稱曰唯上智與下愚不移不移者丹朱四凶三苗之謂  
也當紂之世殷罔不小大好草竊奸宄周公遷殷頑民  
於洛邑其下愚之人必有之矣周公之於三聖不能踰  
也三聖有所不化矣有所不移矣周公之不能化殷之  
頑民所可知也苟不可移必或犯罪罪而弗刑是失所  
也犯而刑之刑不可錯矣孟軻有言盡信書不如無書

有大而言之者刑錯之屬也豈億兆之民歷數十年而無一人犯罪一物失所哉謂之無者盡信書之謂也

儒吏論

士同風於朝農同業於野雖官職務殊地氣異宜然其致功成利未有相害而不通者也至乎末世則不然矣執法之吏不闢先王之典縉紳之儒不通律令之要彼刀筆之吏豈生而察刻哉起於几案之下長於官曹之間無溫裕文雅以自潤雖欲無察刻弗能得矣竹帛之

儒豈生而迂緩也起於講堂之上遊於鄉校之中無嚴  
猛斷割以自裁雖欲不迂緩弗能得矣先王見其如此  
也是以博陳其教輔和民性達其所壅祛其所蔽吏服  
雅訓儒通文法故能寬猛相濟剛柔自克也

爵論

依律有奪爵之法此謂古者爵行之時民賜爵則喜奪  
爵則懼故可以奪賜而法也今爵事廢矣民不知爵者  
何也奪之民亦不懼賜之民亦不喜是空設文書而無

用也今誠循爵則上下不失實而功勞者勸得古之道合漢之法以貨財為賞者不可供以復除為賞者租稅損減以爵為賞者民勸而費省故古人重爵也

又

爵自一級轉登十級而為列侯譬猶秩自百石轉遷而至於公也而近世賞人皆不由算級從無爵封為列侯原其所以爵廢古也司馬法曰賞不踰時欲民速觀為善之利也近世爵廢人有小功無以賞也乃積累焉頒

事足乃封侯非所以速為而及時也上觀古比高祖功臣白起衛鞅皆稍爵為五大夫客卿庶長以至於侯非一頓而封也夫稍稍賜爵與功大小相稱而俱登既得其義且侯次有緒使慕進者逐之不倦矣

安身論

蓋崇德莫盛乎安身安身莫大乎存政存政莫重乎無私無私莫深乎寡欲是以君子安其身而後動易其心而後語宜其交而後行然則動者吉凶之端也語者榮

辱之主也求者利病之幾也行者安危之決也故君子不妄動也必適於道不徒語也必經於理不苟求也必造於義不虛行也必由於正夫然用能免或擊之凶厚自天之祐故身不安則殆言不順則悖交不審則惑行不篤則危四者存乎中則患憂接乎外矣憂患之接必生於自私而興於有欲自私者不能成其私有欲者不能濟其欲理之至也

又務本論畧

末世之吏負青旛而布春令有觀農之名無賞罰之實

又儒吏論畧

古者八歲入小學六甲五方書計之事十五入大學學君臣朝廷王事之紀則文法典藝其存於此矣

連珠

連珠四首

臣聞明主舉士不待近習聖君用人不拘毀譽故呂尚一見而為師陳平烏集而為輔

臣聞記功忘過君臣之道也不念舊惡賢人之業也是以齊用管仲而霸功立秦任孟明而晉恥雪

臣聞振鷺雖材非六翮無以翔四海帝王雖賢非良臣無以濟天下

臣聞觀於明鏡則疵瑕不滯於軀聽於直言則過行不累乎身

贊

正考父贊

恂恂正父應德孔盛身為國卿族則公姓年在耆耋三葉聞政誰能不急申茲約敬饋粥予口樞儻受命銘書金鼎祚及後聖

反金人贊

君子亮直行不柔辟友賤不恥誨焉是益我能發蹤彼用遠迹一言之賜過乎璵璧末世不敦義與茲易言而匪忠退有其謔

銘

刀銘有序

侍中關內侯臣粲言奉命作刀銘及示以其叙二報誠  
必朝氏之刀而張常為工矣輒思作銘謹奉陋不足覽  
相時陰陽制茲利兵和諸色劑考諸濁清灌嬖以數質  
象有呈附反載穎舒中錯形陸刺犀兕水截鯨鯢君子  
服之式章威靈無曰不虞戒不在明

硯銘

昔在皇頡爰初書契以代結繩民察官理庶績誕興在

世季末華藻流淫文不為行書不盡心淳朴澆散俗以  
崩沈墨連翰染榮辱是若念茲在茲惟玄是宅

蕤賓鐘銘

有魏匡國誕成天功底綏六合纂定庶邦承民靡戾休  
徵惟同皇命孔昭造茲衡鍾紀之以三平之以六度量  
允嘉氣齊允淑表聲韶和民聽以睦時作蕤賓永享遐  
福

無射鐘銘

有魏匡國成功允章格于上下光于四方休徵時序人  
悅時康造茲衡鍾有命自皇三以紀之六以平之厥量  
孔嘉厥齊孔時音聲和協人德同熙聽之無斁用以啟  
期

鐘簴銘

惟魏四年歲在丙申龍次大火五月丙寅作蕤賓鐘又  
作無射鍾建安二十三年七月始設鐘簴於文昌殿前  
歲月并銘各鑄於鐘之角

祭文

弔夷齊文

歲晏秋之仲月從王師以南征濟河津而長驅踰芒阜  
之崢嶸覽首陽於東隅見孤竹之遺靈心於挹而感懷  
意惆悵而不平望壇宇而遙弔抑悲古之幽情知養老  
之可歸忘除暴之為仁潔己躬以騁志愆聖哲之大倫  
忘舊惡而希古退採薇以窮居守聖人之清槩要既死  
而不渝厲清風於貪士立果志於懦夫到于今而見稱

為作者之表符雖不同於大道含尼父之所譽

樂府

魏文帝云仲宣獨自善于辭賦惜其體弱不足以起其文至于所善古人無以遠過也詩品云粲詩其源出於李陵發愀愴之辭文秀而質羸在曹劉間別構一體方陳思不足比魏文有餘詩譜云真實有餘澄瀘不足竹林詩評云王粲之作如梗捎犯梓輪囷離奇夫豈

細材哉

太廟頌三章

建安十八年曹操為魏公加九錫始立宗廟令粲作此頌以享其先始名曰顯廟頌後人

更今

名

思皇烈祖時邁其德肇啟洪源貽燕我則我休厥成聿  
先厥道不顯不欽允時祖考

其二

綏庶邦和四宇九功備靈樂序建崇牙設璧羽六佾奏  
八音舉昭大孝衍妣祖念武功收純祜

其三

於穆清廟翼翼休徵祁祁髦士厥德允升懷想成位咸

舜在宮無思不若允觀厥崇

俞兒舞歌四首

矛俞新福歌

漢初建國家匡九州蠻荆震服五刃三革休安不忘備  
武樂修宴我賓師敬用御天永樂無憂子孫受百福常  
與松喬遊蒸庶德莫不咸歡柔

弩俞新福歌

材官選士劒弩錯陳應桴蹈節俯仰若神綏我武烈篤

我淳仁自東自西莫不來賓

安臺新福歌

武功既定庶士咸綏樂陳我廣庭式宴賓與師昭文德  
宣武威平九有撫民黎荷天寵延壽尸千載莫我違

行辭新福歌

神武用師士素厲仁恩廣覆猛節橫逝自古立功莫我  
弘大桓桓征四國爰及海裔漢國保長慶垂祚延萬世

詩

贈蔡子篤

翼翼飛鸞載飛載東我友云徂言戾舊邦  
舫舟翩翩以泝大江蔚矣荒塗時行靡通慨我懷慕君子所同悠悠  
世路亂離多阻濟岱江行邈焉異處風流雲散一別如  
雨人生實難願其弗與曠望遐路允企伊佇烈烈冬日  
肅肅淒風潛鱗在淵歸鴈載軒苟非鴻鵠孰能飛翻雖  
則追慕予思罔宣瞻望東路慘愴增歎率彼江流爰逝  
靡期君子信誓不遷于時及予同寮生死固之何以贈

行言授期詩中心孔悼涕淚漣而嗟爾君子如何勿思

追五臣  
作進

贈士孫文始

三輔決錄云士孫萌字文始少有才學年十五能屬文初董卓之誅

也萌父瑞知王允必敗京師不可居乃命萌將家屬至荊州依劉表去無幾果為李傕等所殺及天子都許昌追論誅董卓之功封萌為澹津亭侯與山陽王粲善萌當就國粲作

詩以  
贈萌

天降喪亂靡國不夷我暨我友自彼京師宗守盪失越用遁違遷于荆楚在漳之湄在漳之湄亦克晏處和通

篪埙比德車輔既度禮義卒獲笑語庶幾永日無讐厥  
緒雖曰無讐時不我已同心離事乃有逝止橫此大江  
淹彼南汜我思弗及載坐載起惟彼南汜君子居之悠悠  
我心薄言慕之人亦有言靡詰不思矧伊嬿婉胡不  
悽而晨風夕逝託與之期瞻仰王室慨其永歎良人在  
外誰佐天官四國方阻俾爾歸藩爾之歸藩作式下國  
無曰蠻裔不虔汝德慎爾所主率由嘉則龍雖勿用志  
亦靡忒悠悠澹澧鬱彼唐林雖則同域邈其迥深白駒

遠志古人所箴允矣君子不遐厥心既往既來無密爾

音詰一作日  
主一作之

贈文叔良

翩翩者鴻率彼江濱君子于于征爰聘西鄰臨此洪渚伊  
思梁岷爾行孔邈如何勿勤君子敬始慎爾所主謀言  
必賢錯說申輔延陵有作僑肸是與先民遺跡來世之  
矩既慎爾主亦迪知幾探情以華覩著知微視明聽聰  
靡事不惟董褐荷名胡寧不師衆不可蓋無尚我言梧

宮致辯齊楚構患成功有要在衆思歡人之多忌掩之  
實難瞻彼黑水滔滔其流江漢有卷允來厥休二邦若  
否職汝之由緬彼行人鮮克弗留尚哉君子異于他仇  
人誰不勤無厚我憂惟詩作贈敢詠在舟

思親詩

為藩文  
則作

穆穆顯妣德音徽止思齊先姑志侔姜姒躬此勞瘁鞠  
予小子小子之生遭世罔寧烈考勤時從之于征奄邁  
不造殷憂是嬰浴于靡及退守祧祊五服荒離四國分

爭禍難斯逼救死於頸嗟我懷歸弗克弗逞聖善獨勞  
莫慰其情春秋代逝于茲九齡緬彼行路焉託予誠予  
誠既否委之于天庶我顯妣克保遐年亹亹惟懼心乎  
如懸如何不弔早世徂顛於存弗養於後弗臨遺愆在  
體慘痛切心形景尸立魏爽飛沈在昔蓼莪哀有餘音  
我之此譬憂其獨深胡寧視息以濟于今巖巖叢險則  
不可摧仰瞻歸雲俯聆飄回飛焉靡翼超焉靡階思若  
流波情似坻頽詩之作矣情以告哀

前顯字初學記作皇後顯字一作剛

襍詩

日暮遊西園冀寫憂思情曲池揚素波列樹敷丹榮上有特棲鳥懷春向我鳴褰衽欲從之路險不得征徘徊不能去佇立望爾形風飈揚塵起白日忽已冥回身入空房託夢通精誠人欲天不違何懼不合并

飈一作飄

襍詩四首

吉日簡清時從君出西園方軌策良馬並驅厲中原北臨清漳水西看柏楊山回翔遊廣圃逍遙波水間

其二

列車息衆駕相伴綠水湄幽蘭吐芳烈芙蓉發紅暉百鳥何續翻振翼羣相追投網引潛魚強弩下高飛白日已酉邁歡樂忽忘歸

其三

聯翻飛鸞鳥獨遊無所因毛羽照野草哀鳴入層雲我尚假羽翼飛覩爾形身願及春陽會交頸邁殷勤

其四

鷺鳥化為鳩遠竄江漢邊遭遇風雲會託身鸞鳳間天姿既否戾受性又不閑邂逅見逼迫俛仰不得言

七哀詩三首

西京亂無象豺虎方遘患復棄中國去委身適荆蠻親戚對我悲朋友相追攀出門無所見白骨蔽平原路有飢婦人抱子棄草間顧聞號泣聲揮涕獨不還未知身死處何能兩相完驅馬棄之去不忍聽此言南登霸陵岸回首望長安悟彼下泉人喟然傷心肝

其二

荆蠻非我鄉何為久滯淫方舟溯大江日暮愁我心山岡有餘映巖阿增重陰狐狸馳赴穴飛鳥翔故林流波激清響猴猿臨岸吟迅風拂裳袂白露沾衣襟獨夜不能寐攝衣起撫琴絲桐感人情為我發悲音羈旅無終極憂思壯難任

其三

見古文苑

邊城使心悲昔吾親更之冰雪截肌膚風飄無止期百

里不見人草木誰當遲  
登城望亭隧翩翩飛戍旗行者  
不顧返出門與家辭子弟多俘虜哭泣無已時  
天下盡樂土何為久留茲蓼蟲不知辛去來勿與諧

詠史詩

自古無殉死達人所共知  
秦穆殺三良惜哉空爾為結髮事明君受恩良不訾  
臨沒要之死焉得不相隨妻子當門泣兄弟哭路陲  
臨穴呼蒼天涕下如纏縻人生各有志終不為此移  
同知埋身劇心亦有所施生為百夫

雄死為壯士規黃鳥作哀詩至今聲不虧

公讌詩

昊天降豐澤百卉挺歲蕤涼風撤蒸暑清雲却炎暉高  
會君子堂並坐蔭華棟嘉肴充圓方旨酒盈金罍管絃  
發徽音曲度清且悲合坐同所樂但憇枮行遲常聞詩  
人語不醉且無歸今日不極歡含情欲待誰見眷良不  
翹守分豈能違古人有遺言君子福所綏願我賢主人  
與天享巍巍克符周公業奕世不可追

從軍詩五首

從軍有苦樂但問所從誰所從神且武焉得久勞師相  
公征關右赫怒震天威一舉滅獯虜再舉服羌夷西收  
邊地賊忽若俯拾遺陳賞越丘山酒肉踰川坻軍中多  
沃饒人馬皆溢肥徒行兼乘還空出有餘資拓地三千  
里往返一如飛歌舞入鄴城所願獲無違晝日處大朝  
日暮薄言歸外叅時明政內不廢家私禽獸憚為犧良  
苗實已揮竊慕負鼎翁願厲朽鈍姿不能效沮溺相隨

把鋤犁熟覽夫子詩信知所言非

其二

涼風厲秋節司典告詳刑我君順時發桓桓東南征汎  
舟蓋長川陳卒被隰垌征夫懷親戚誰能無戀情拊衿  
倚舟檣眷眷思鄴城哀彼東山人喟然感鶴鳴日月不  
安處人誰獲恒寧昔人從公旦一徂三齡今我神武  
師暫往必速平棄余親睦恩輸力竭忠貞懼無一夫用  
報我素餐誠夙夜自憐性思逝若抽榮將秉先登羽豈

敢聽金聲

恒善本  
作常

其三

從軍征遐路討彼東南夷方舟順廣川薄暮未安坻白  
日半西山桑梓有餘暉蟋蟀夾岸鳴孤鳥翩翩飛征夫  
心多懷悽愴令吾悲下船登高防草露霑我衣迴身赴  
牀寢此愁當告誰身服干戈事豈得念所私即戎有授  
命茲理不可違

悽善  
作惆

其四


朝發鄴都橋暮濟白馬津逍遙河隄上左右望我軍連  
舫踰萬艘帶甲千萬人率彼東南路將定一舉勲籌策  
運帷幄一由我聖君恨我無時謀譬諸具官臣鞠躬中  
堅內微畫無所陳許厯為完士一言猶敗秦我有素餐  
責誠愧伐檀人雖無鈔刀用庶幾奮薄身猶善本作獨

其五

悠悠涉荒路靡靡我心愁四望無烟火但見林與丘城  
郭生榛棘蹊徑無所由蘊蒲竟廣澤葭葦夾長流日夕

涼風發翩翩漂吾舟寒蟬在樹鳴鶴鵠摩天遊客子多  
悲傷淚下不可收朝入譙郡界曠然消人憂雞鳴達四  
境黍稷盈原疇館宅充鄺里士女滿莊馗自非賢聖國  
誰能享斯休詩人美樂土雖客亦願留

漢魏六朝百三家集卷二十九



總校官庶吉士臣侍朝  
校對官檢討臣盧應  
謄錄監生臣閔思紀

欽定四庫全書叢要

集部

漢魏六朝百三家集卷三十三

三十三至

詳校官候選知縣臣吳旬華



欽定四庫全書叢要卷一萬九千六百十九

卷六

漢魏六朝百二家集卷三十

明  
張溥  
輯

阮瑀集

賦

鸚鵡賦

惟翩翩之艷鳥誕嘉類於京都穢澆風而弗處慕聖惠  
而來徂被坤文之黃色服離光之朱形配秋英以離綠

苞天地以耀榮

止欲賦

夫何淑女之佳麗顏爛爛以流光歷千代其無匹超古今而特章執妙年之方盛性聰惠以和良稟純潔之明節後申禮以自防重行義以輕身志高尚乎貞姜情私悅其美麗無須臾而有忘思桃天之所宜願無衣之同裳懷紝結而不暢魂一夕而九翔出房戶以躑躅覩天漢之無津傷匏瓜之無偶悲織女之獨勤還伏枕以求

寐庶通夢而交神神惚恍而難遇思交錯以繽紛遂終夜而靡見東方旭以既晨知所思之不得乃抑情以自信

箏賦

惟夫箏之奇妙極五音之幽微苞羣聲以作主冠衆樂而為師稟清和於律呂籠絲木以成資身長六尺應律數也故能清者感天濁者合地五聲並用動靜簡易大興小附重發輕隨折而復扶循覆逆開浮沈抑揚升降

綺靡殊聲妙巧不識其為平調足均不疾不徐遲速合度君子之行也慷慨磊落卓礪盤紆壯士之節也曲高和寡妙伎雖工伯牙能琴於茲為朦噭繹翕純庶配其蹤延年新聲豈比能同陳惠李文曷能是逢

紀征賦

仰天民之高衢兮慕在昔之遐軌希篤聖之崇綱兮惟弘哲而為紀同天工而人代兮匪賢智其能使五材陳而並序兮靜亂由乎干戈惟蠻荆之作讎兮將治兵而

濟河遂臨河而就濟兮瞻禹績之茫茫距疆澤以潛流  
兮經崑崙之高岡目幽蒙以廣衍兮遂霑濡而難量

論

文質論

蓋聞日月麗天可瞻而難附羣物著地可見而易制夫  
遠不可識文之觀也近而易察質之用也文虛質實遠  
疎近密援之斯至動之應疾兩儀通數固無攸失若乃  
陽春敷華遇衝風而隕落素葉變秋既究物而定體麗

物若偽醜器多牢華璧易碎金鉄難陶故言多方者中  
難處也術饒津者要難求也意弘博者情難足也性明  
察者下難事也通士以四奇高人必有四難之忌且少  
言辭者政不煩也寡知見者物不擾也專一道者思不  
散也混濛蔑者民不備也質士以四短違人必有四安  
之報故曹參相齊寄託獄市欲令奸人有所容立及為  
宰相飲酒而已故夫安劉氏者周勃正嫡位者周勃大  
臣不強不至華言孝文上林苑欲拜嗇夫釋之前諫意

崇敦朴自是以降其為宰相皆取堅強一學之士安用奇才使變典法

書

為曹公作書與孫權

初權兄策并江東魏武力未能逞且欲撫之  
以弟女配策弟匡為子彭取孫賁女及策薨  
權遂西連蜀漢結

好劉備故書與權

離絕以來于今三年無一日而忘前好亦猶姻媾之義  
恩情已深違異之恨中間尚淺也孤懷此心君豈同哉

世覽古今所由改趣因緣侵辱或起瑕釁心忿意危用  
成大變若韓信傷心於失楚彭寵積望於無異盧綰嫌  
畏於已隙英布憂迫於情漏此事之緣也孤與將軍恩  
如骨肉割授江南不屬本州豈若淮陰捐舊之恨抑遏  
劉馥相厚益隆寧放朱浮顯露之奏無匿張勝貸故之  
變匪有陰構貳赫之告固非燕王淮南之釁也而忍絕  
王命明棄碩交實為佞人所構會也夫似是之言莫不  
動聽因形設象易為變觀示之以禍難激之以恥辱大

丈夫雄心能無憤發昔蘇秦說韓羞以牛後韓王按劖作色而怒雖兵折地割猶不為悔人之情也仁君年壯氣盛緒信所嬖既懼患至薰懷忿恨不能復遠度孤心近慮事勢遂齎見薄之決計秉翻然之成議加劉備相扇揚事結亹連推而行之想暢本心不願於此也孤以薄德位高任重幸蒙國朝將泰之運蕩平天下懷集異類喜得全功長享其福而姻親坐離後援生隙常恐海內多以相責以為老夫包藏禍心陰有鄭武取胡之詐

乃使仁君翻然自絕以是忿忿懷慙反側常思除棄小事更申前好二族俱榮流祚後嗣以明雅素忠誠之效抱懷數年未得散意昔赤壁之役遭離疫氣燒船自還以避惡地非周瑜水軍所能抑挫也江陵之守物盡殲禪無所復據徙民還師又非瑜之所能敗也荆土本非已分我盡與君冀取其餘非相侵肌膚有所割損也思計此變無傷於孤何必自遂於此不復還之高帝設爵以延田橫光武指河而誓朱鮑君之負累豈如二字是

以至情願聞德音往年在譙新造舟船取足自載以並  
九江貴欲觀湖灘之形定江濱之民耳非有深入攻戰  
之計也將恐議者大為已榮自謂策得長無西患重以  
此故未肯迴情然智者之慮慮於未形達者所規規於  
未兆是故子胥知姑蘇之有麋鹿輔果識智伯之為趙  
禽穆生謝病以免楚難鄒陽北游不同吳禍此四士者  
豈聖人哉徒通變思深以微知著耳以君之明觀孤術  
數量君所據相計土地豈勢少力乏不能遠舉割江之

表晏安而已哉甚未然也若恃水戰臨江塞要欲令王師終不得渡亦未必也夫水戰千里情巧萬端越為三軍吳曾不禁漢潛夏陽魏豹不意江湖雖廣其長難衛也凡事有宜不得盡言將修舊好而張形勢更無以威脅重敵人之心然有所恐恐書無益何則往者軍逼而自引還今日在遠而興慰納辭遜意狹謂其力盡適以增驕不足相動但明效古當自圖之耳昔淮南信左吳之策魄囂納王元之言彭寵受親吏之計三夫不寤終為

世笑梁王不受詭勝寶融斥逐張玄二賢既覺福亦隨之願仁君少留意焉若能內取子布外擊劉備以效赤心用復前好則江表之任長以相付高位重爵坦然可觀上令聖朝無東顧之勞下令百姓保安全之福君享其榮孤受其利豈不快哉若忽至誠以處僥倖婉彼二人忍不加罪所謂小人之仁大人之賊大雅之人不肯為此也若憐子布願言俱存亦能傾心去恨順君之情更與從事取其後善但禽劉備亦足為效開設二者審

處一焉聞荆揚諸將並得降者皆言交州為君所執豫  
章距命不承執事疫旱並行人兵損減各求進軍其言  
云云孤聞此言未以為悅然道路既遠降者難信幸人  
之災君子不為且又百姓國家之有加懷區區樂欲崇  
和庶幾明德來見招副不勞而定於孤益貴是故按兵  
守次遣書致意古者兵交使在其中願仁君及孤虛心  
迴意是以應詩人補袞之歎而慎周易牽復之義濯鱗  
清流飛翼天衢良時在茲勗之而已

為武帝與劉備書

披懷解帶投分寄意

牋

謝大祖牋

一得披玄雲望白日惟力是視敢有二心

文

弔伯夷文

余以王事適彼洛師瞻望首陽敬弔伯夷東海讓國西

山食薇重德輕身隱景潛暉求仁得仁報之仲尼沒而不朽身沈名飛

詩

駕出北郭門

談藝錄云樂府往往叙事故與詩殊益叙事辭緩則冗不精翩翩堂前燕疊字極促乃佳

阮瑀駕出北郭門視孤

兒行大緩弱不逮矣

駕出北郭門馬樊不肯馳下車步踟躕一作躕仰折枯楊

枝顧聞丘林中噭噭有悲啼借問啼者出何為乃如斯

親母舍我歿後母憎孤兒飢寒無衣食舉動鞭捶施骨  
消肌肉盡體若枯樹皮藏我空室中父還不能知上塚  
察故處存亡永別離親母何可見淚下聲正嘶棄我于  
此間窮厄豈有貲傳告後代人以此為明規

### 琴歌

魏文士傳云太祖雅聞瑞名辟之不應乃逃入山中太祖使人焚山得瑞太祖時征長安大延賓客怒瑞不與語使就技人列瑞善聲音能鼓琴撫絃而歌為典既捷音聲殊妙太祖大悅按典略文章志瑞建安初辭疾得召即起不得有焚山事太祖征荊州瑞作書十

六年入關而云得瑞在長安瑞十七年卒  
太祖次年為魏公辭稱大魏愈知其妄矣

奕奕天門開大魏應期運青蓋巡九州在東西人怨士  
為知己死女為悅已玩恩義苟潛暢他人焉能亂

詠史詩二首

其一

誤哉秦穆公身沒從三良忠臣不違命隨軀就死亡低  
頭闖墻戶仰觀日月光誰謂此何處恩義不可忘路人  
為流涕黃鳥鳴高桑

其二

燕丹養勇士荆軻為上賓圖擢盡七首長驅西入秦素  
車駕白馬相送易水津漸離擊筑歌悲聲感路人舉坐  
同咨嗟嘆氣若青雲

襍詩二首

其一

臨川多悲風秋日苦清涼客子易為戚感一作對

此用哀

傷攬衣起躑躅上觀心與房三星守故次明月未收光

雞鳴當何時朝晨尚未央還坐長嘆息憂安可忘

其二

我行自凜秋季冬乃來歸置酒高堂上友朋集光輝念  
當復離別涉路險且夷思慮益惆悵淚下沾裳衣

七哀詩

丁年難再遇富貴不重來良時忽一過身體為土灰冥  
冥九泉室漫漫長夜臺身盡氣力索精魂靡所能一作迴  
嘉殼設不御旨酒盈觴杯出墳望故鄉但見蒿與萊

隱士

四皓潛南岳老萊竄河濱顏回樂陋巷許由安賤貧伯夷餓首陽天下歸其仁何患處貧苦但當守明真

苦雨

苦雨滋玄冬引日彌且長丹墀自殲殪深樹猶沾裳客行易感悴我心摧已傷登臺望江汎陽侯沛洋洋

失題

白髮隨櫛墮未寒思厚衣四支易懈倦行步益疎遲常

恐時歲盡魂魄忽高飛自知百年後堂上生旅葵

公讌

陽春和氣動賢主以崇仁布惠綏人物降愛常所親上堂相娛樂中外奉時珍五味風雨集杯酒若浮雲闕

怨詩

民生受天命漂若河中塵雖稱百齡壽孰能應此身猶

獲嬰凶禍流落

一作流離恒苦心

闕

漢魏六朝百三家集卷三十